

<b>DIRECCIÓN GENERAL DE POLÍTICA LINGÜÍSTICA</b> Serviciu de Planificación y Conocimientu de la Llingua Asturiana
<b>PROPUESTA DE RESOLUCIÓN</b> pola que se convoca'l II Premiu «Enriqueta González Rubín» de Narrativa moza en llingua asturiana

## PROPUESTA DE RESOLUCIÓN

Examináu l'espeditu de referencia resultan estos

### FECHOS

**Primero.-** L'espardimientu, fomentu y normalización social del asturianu nes sos diverses manifestaciones, según lo dispuesto nel Estatutu d'Autonomía del Principáu d'Asturies y la Llei 1/98, de 23 de marzu, d'Usu y Promoción del Bable/Asturianu, impliquen l'atención a los diversos sectores sociales, culturales y empresariales qu'intervienen nel procesu. Nesti sentíu, l'artículu 13 de dicha llei refierse espresamente al espardimientu y protecció de les manifestaciones culturales y artístiques n'asturianu; asina la creación lliteraria, en cuantes que manifestación cultural y artística de primer orde, ye merecedora d'espardimientu y protecció.

**Segundo.-** Fomentar la creatividá lliteraria contribúi claramente a desenvolver el conteníu cultural de la sociedá, sobre manera teniendo en cuenta la importancia de la lliteratura, en cualquiera de les tantes manifestaciones como tien, nel nuestru tiempu. Sábese tamién que la escritura, que naz de la voluntá de creación y comunicació, lleva con ella un trabayu personal bien importante, una dedicació de tiempu y esfuerzu que, anque nun se puen medir en términos económicos porque'l valir intrínsecu de la lliteratura tresciende estos parámetros, sí que se puen reconocer ya incentivar polos poderes públicos.

**Tercero.-** Cola mira de llograr esti oxetivu, por Resolución de la Conseyería de Cultura y Turismu de 30 de setiembre del 2021 (*BOPA* de 13 d'ochobre del 2021), aprobáronse les bases del Premiu «Enriqueta González Rubín» de Narrativa moza. La base séptima de les bases mentaes recueye que na resolución de convocatoria del premiu podrá prevése, d'existir disponibilidad presupuestaria, una dotación económica pal mesmu.

**Cuarto.-** Na Llei del Principáu d'Asturies 6/2021, de 30 d'avientu, de Presupuestos Xenerales pa 2022, contiense creitu específicu pa la dotación económica del Premiu «Enriqueta González Rubín» de Narrativa moza en llingua asturiana na partida presupuestaria 18.04.422R-482.062, denominada "Premios lliterarios en llingua asturiana". Coles mesmes, el Plan Estratéxicu de Subvenciones de la Conseyería de Cultura, Política Llingüística y Turismu pal periodu 2020-2022 (aprobáu por Resolución de 18 de febreru de 2020 y publicáu en *BOPA* el 27 de febreru del 2020), modificáu acordies cola resolución de primer cambéu parcial del Plan Estratéxicu de Subvenciones pal exerciciu 2020-2022 (aprobada por Resolución del 10 de febreru de 2021 y publicada en *BOPA* l 26 de febreru del 2021) prevé la convocatoria d'esti premiu.

**Quinto.-** Ye por esto que la Conseyería de Cultura, Política Llingüística y Turismu considera que procede la convocatoria del Premiu «Enriqueta González Rubín» de Narrativa moza en llingua asturiana na so segunda edición, empobináu a consolidar, arriquecer y prestixar la llingua y la cultura asturianas, na creencia, amás, de qu'actuaciones como esta contribúin de forma eficaz a dinamizar l'actividá cultural de la Comunidá Autónoma, y, n'especial, un aspectu tan importante de la mesma como ye'l de la creación lliteraria ente autores mocos y mozos. La incorporación de la mocedá a la xera lliteraria ye un valor qu'asegura la continuidá lliteraria; anque la lliteratura escrita n'asturianu tien una tradición secular precisa siempre renovación y actualización en forma de valores xóvenes.

A estos fechos son-yos d'aplicación estos

#### FUNDAMENTOS DE DERECHU

**Primero.-** L'artículu 3 del Decretu 71/92, de 29 d'ochobre, que regula'l Réxime Xeneral de Subvenciones, en rellación col artículu 38 de la Llei 6/1984, de 5 de xunetu, del Presidente y del Conseyu de Gobiernu del Principáu d'Asturies, l'artículu 10 del Decretu 13/2019, de 24 de xunetu, del Presidente del Principáu, de Reestructuración de les Conseyerías qu'integren l'Alministración de la Comunidá Autónoma, lo mesmo que l'artículu 14 de la Llei 2/1995, de 13 de marzu, sobre Réxime Xurídicu de l'Alministración del Principáu d'Asturies; too ello en cuantes a la determinación de les competencies y facultaes p'adoptar la presente resolución.

**Segundo.-** D'alcuertu col artículu 37 de la Llei 2/1995, de 13 de marzu, sobre Réxime Xurídicu de l'Alministración del Principáu d'Asturies, el Decretu 86/2019, de 30 d'agostu, pol que s'establez la estructura orgánica básica de la Conseyería de Cultura, Política Llingüística y Turismu y la Resolución de 10 d'ochobre de 2019, de la Conseyería de Cultura, Política Llingüística y Turismu pola que se deleguen competencies (BOPA del 18 d'ochobre de 2019), ye competencia de la persona titular de la Dirección Xeneral de Política Llingüística l'autorización y disposición de gastos correspondientes a la Dirección Xeneral, hasta'l límite de 18.000 euros, que se financien con cargu al programa presupuestariu xestionáu pola Dirección Xeneral.

**Tercero.-** Sicasí, por razones d'economía procesal y simplificación de trámites, pue la Ilma. Sra. Conseyera conocer del presente espediente avocando les competencies delegaes n'aplicación del artículu 17 de la Llei 2/1995, de 13 de marzu, sobre Réxime Xurídicu de l'Alministración del Principáu, al tramitase conxuntamente toles fases del espediente de gastu.

**Cuarto.-** Ye aplicable lo dispuesto na Llei 38/2003, de 17 de payares, Xeneral de Subvenciones y el Decretu 71/1992, de 29 d'ochobre, sobre Réxime Xeneral de Concesión de Subvenciones.

En virtú de lo espuesto y d'alcuertu colo previsto nos artículos 8c) y 41 del Testu refundíu del Réxime Económicu y Presupuestariu, aprobáu pol Decretu Llexislativu del Principáu d'Asturies 2/1998, de 25 de xunu, pola presente,

## PROPONGO

**Primero.-** Aprobar la convocatoria, en réxime de concurrencia competitiva, del Premiu «Enriqueta González Rubín» de Narrativa moza en llingua asturiana, na so segunda edición, con una dotación económica de trés mil euros (3.000 €), pa noveles o escoyetes de cuentos, escritos en llingua asturiana, de tema y estructura llibres que seyan inédites, non premiaes n'otros concursos y tengan una estensión mínima de 50 páxines a doble espaciu con un mínimu de 100.000 caracteres Times New Roman o asemeyao, tamaño 12.

**Segundo.-** Avocar pa sí'l conocimientu de los actos delegaos de gastu, autorizando un gastu por importe de tres mil euros (3.000,00 €) euros con cargu a l'aplicación presupuestaria 18.04.422R-482.062 de los Presupuestos Xenerales del Principáu d'Asturies pal añu 2022.

**Tercero.-** Esta convocatoria ha rexise poles bases reguladores del Premiu «Enriqueta González Rubín» de Narrativa moza en llingua asturiana aprobaes por Resolución de 30 de setiembre de 2021 (*BOPA* de 13 d'ochobre del 2021) de la Conseyería de Cultura, Política Llingüística y Turismu.

**Cuarto.-** A esta convocatoria del II Premiu «Enriqueta González Rubín» de Narrativa moza en llingua asturiana van poder presentar solicitú de participación aquelles persones físiques menores de 31 años nel momentu del fin de plazu de presentación de solicitúes na presente convocatoria y que s'alcuentren na situación que fundamente la concesión del premiu, concurrendo nellos les circunstancies previstes nes bases reguladores y que cumplan los requisitos establecíos na Llei 38/2003, de 17 de payares.

En casu de'obres escritas por dos o más autores, ha constar espresamente, nel SOBRE A, el porcentaxe del importe del premiu imputable a caúna de les persones a les que s'atribúi l'autoría de la obra, que van tener igualmente la condición de persones beneficiaries. Dambos autores tienen de cumplir el criteriu d'edá indicáu más arriba.

Acordies colo dispuesto nel artículu 13.2 y) de la Llei 38/2003, de 17 de payares, les persones beneficiaries tendrán d'acreditar tar al corriente de les sos obligaciones tributaries y cola Seguridá Social con anterioridá a dictase la propuesta de resolución de concesión. Les persones beneficiaries tendrán de cumplir coles obligaciones en materia de trespencia d'aluerdu colo estableció nel artículu 2 de la Llei 8/2018, de 14 de setiembre, de Trespencia, Bon Gobiernu y Grupos d'Interés.

**Quinto.-** Les solicitúes de participación han dirixise al Serviciu de Planificación y Conocimientu de la Llingua Asturiana de la Direcció Xeneral de Política Llingüística de la Conseyería de Cultura, Política Llingüística y Turismu, y van poder presentase dende l'otru día desque se publique l'Extractu de la correspondiente convocatoria nel *Boletín Oficial del Principáu d'Asturies*. Conforme a lo dispuesto nes bases d'esti galardón, han presentase nel Rexistru Electrónicu Xeneral de l'Alministración del Principáu d'Asturies o por cualesquiera de los medios establecíos nel artículu 16 de la Llei 39/2015, de 1 d'ochobre. Si n'usu d'esti derechu la solicitú ye unviada per corréu, tendrá de ser presentada en sobre abiertu pa que la solicitú seya fechada y sellada por personal de correos.

Les solicitúes han presentase en modelu normalizáu, que s'alcuentra disponible nel formulariu con códigu de trámite SITE PREM025T01 de la sede electrónica del Principáu d'Asturies (<https://sede.asturias.es>). Pa la so localización podrá metese'l códigu PREM0025T01 nel buscador de la cabecera (asitiáu na parte superior derecha de la páxina) y yá nel procedimientu, nel apartáu "Documentación relacionada" podrá descargar el formulariu de solicitú correspondiente al II Premiu «Enriqueta González Rubín» de Narrativa moza en lengua asturiana.

En tolos casos, les solicitúes van dir acompañaes de dos sobres zarraos nos que se va enseñar nel so anversu SOBRE A o SOBRE B, según correspuenda, al Premiu «Enriqueta González Rubín» de Narrativa moza en llingua asturiana, el títulu de la obra y el seudónimu de quien ostente l'autoría de la obra. Caún de los sobres va contener la siguiente documentación:

**SOBRE A:**

- Datos ya identificación del autor/a o autores (fotocopia del DNI, dirección, teléfonu, corréu electrónicu, currículum curtiu y, nel so casu, indicación espresa del porcentaxe del importe del premiu imputable a caúna de les persones a les que s'atribuye l'autoría de la obra).
- Declaración responsable de la persona solicitante o representante legal relativa a estos estremos: tar al corriente de les sos obligaciones tributaries y de seguridá social, nun ser deudora de la Hacienda del Principáu d'Asturies por deudes vencíes, líquides y esixibles; relación de subvenciones solicitaes mesmo que les concedíes cola mesma finalidá; y si procedió a la xustificación de les subvenciones y ayudes concedíes con anterioridá pola Comunidá Autónoma. Nel casu d'autoría múltiple, cada persona a quien s'atribuya l'autoría va presentar la so declaración responsable.

#### **SOBRE B:**

- Orixinal de la obra en formatu dixital (PDF y Word) y cinco copies en papel.

La presentación de solicitúes al II Premio «Enriqueta González Rubín» de Narrativa moza en llingua asturiana, implica'l conocimientu y aceptación de les bases reguladores y la presente convocatoria.

**Sesto.-** El plazu pa presentar la solicitú de participación va ser de trenta díes naturales a cuntar dende l'otru día a la publicación del extractu de la presente convocatoria nel *Boletín Oficial del Principáu d'Asturies*. D'alcuertu colo previsto nel artículu 30.5. de la Llei 39/2015, de 2 d'ochobre, del Procedimientu Alministrativu Común de les Alministraciones Públiques, cuando l'últimu día del plazu seya inhábil, va entendese prorrogáu al siguiente primer día hábil.

**Séptimo.-** Rematáu'l plazu de presentación de solicitúes, estes van ser valoraes por un xuráu que va presidir la persona titular de la Dirección Xeneral de Política Llingüística (o

persona en quien delegue). El xuráu va ser nomáu por resolución de la Conseyera de Cultura, Política Llingüística y Turismu y va tar formáu por un máximu de nueve y un mínimu de cinco persones relacionaes col ámbitu del mundu cultural y lliterariu asturianu, actuando como secretariu/a, personal adscrito a la Dirección Xeneral de Política Llingüística.

**Octavo.-** El fallu del premiu propuestu pol xuráu va inspirase nos principios d'oxetividá, tresporencia, igualdá, non discriminación, publicidá y concurrencia competitiva por aciu la valoración del proyectu lliterariu narrativu que se presente. Los criterios de valoración van ser estos:

**Creatividá y orixinalidá de la obra (hasta 40 puntos)**

Mui alta: de 30 a 40 puntos

Alta: de 20 a 29 puntos

Moderada: de 10 a 19 puntos

Baxa: de 0 a 9 puntos

**Estructura y ritmu de la narración (hasta 30 puntos)**

Mui alta: de 20 a 30 puntos

Alta: de 10 a 19 puntos

Moderada: de 5 a 9 puntos

Baxa: de 0 a 4 puntos

**Riqueza y adecuación llingüística en coherencia col desarrollu de la obra (hasta 30 puntos)**

Mui alta: de 20 a 30 puntos

Alta: de 10 a 19 puntos

Moderada: de 5 a 9 puntos

Baxa: de 0 a 4 puntos

El xuráu va poder declarar desiertu'l premiu si los proyectos presentaos nun algamen la puntuación mínima de 10 puntos en caún de los apartaos.

**Noveno.-** Antes de la concesión del premiu, la persona o persones beneficiaries han aportar documentación acreditativa de la so personalidá, declaración responsable de nun tar incursas nes prohibiciones previstes nel artículu 13 de la Llei Xeneral de Subvenciones y certificados de tar al corriente de les sos obligaciones tributaries y cola Seguridá Social. Ensin perjuiciu de lo anterior, la participación na convocatoria va aportar, quitando manifestación espresa de lo contrario, l'autorización a l'Alministración del Principáu d'Asturies pa pescanciar la documentación enriba referenciada, d'alcuerdu con lo previsto nel artículu 28 de la Llei 39/2015, de 2 d'ochobre, del Procedimientu Alministrativu Común de les Alministraciones Públiques. La persona o persones que resulten ganadores del II Premiu «Enriqueta González Rubín» de Narrativa moza en llingua asturiana van recibir como galardón un troféu que se va entregar nel l'actu convocáu con esi envís pol Gobiernu del Principáu d'Asturies. Amás, el Gobiernu del Principáu d'Asturies va velar pola promoción y difusión de la obra premiada nos medios de comunicación, redes sociales y nos eventos entamaos o promovíos pol mesmu gobiernu y va fomentase la participación de la persona o persones galardonaes nes actividaes culturales que se programen dende'l gobiernu asturianu.

**Décimo.-** D'alcuerdu cola base séptima de las bases reguladoras aprobaes por Resolución de 30 de septiembre de 2021 (BOPA de 13 d'ochobre de 2021) de la Consejería de Cultura, Política Llingüística y Turismu, la citada consejería resérvase'l derechu de publicar n'esclusiva la primer edición de les obres premiaes, dando por retribuyíos col premiu los derechos d'autor d'esta edición primera.

Igualmente toles reediciones y traducciones que se fagan de la obra ganadora han facer constar que recibió'l II Premiu «Enriqueta González Rubín» de Narrativa moza en llingua asturiana otorgáu pol gobiernu del Principáu d'Asturies.

**Decimoprimeru.-** El Serviciu de Planificación y Conocimientu de la Llingua Asturiana, dependiente de la Dirección Xeneral de Política Llingüística de la Consejería de Cultura, Política Llingüística y Turismu, va adoptar toles midíes necesaries pal desenvolvimientu de



les bases y d'esta convocatoria, llevando a cabu la ordenación ya instrucción del procedimientu. La consejera de Cultura, Política Llingüística y Turismu ha dictar la resolución de concesión, que va publicase nel *Boletín Oficial del Principáu d'Asturies*, colo que se va considerar notificada conforme a lo estableció nel artículu 45 de la Llei 39/2015, de 2 d'ochobre.

**Decimosegundo.-** Los trabayos que nun resulten premiaos van poder recoyese por quienes presentaren la solicitud, o persona autorizada, nun plazu que nun pase de tres meses dende la fecha del fallu del xuráu. Pa ello, han presentar una copia del formulariu de solicitú na que conste la fecha de presentación de la mesma. En pasando esti plazu ensin que se retiraren, la Consejería de Cultura, Política Llingüística y Turismu podrá proceder a la so destrucción.

**Decimotercero.-** Disponer la publicación del extractu d'esta convocatoria nel *Boletín Oficial del Principáu d' Asturies* (BOPA), pudiendo consultase'l testu completu de la mesma na Base de Datos Nacional de Subvenciones (<http://www.pap.minhap.gob.es/bdnstrans/index>), de conformidá colo previsto nos artículos 18.2 y 20.8.a) de la Llei 38/2003, de 17 de payares, Xeneral de Subvenciones.

Esta Resolución remata la vía alministrativa y va poder recurrise potestativamente en reposición, énte la consejera de Cultura, Política Llingüística y Turismu, nel plazu d'un mes computáu dende l'otru día de publicase l'extractu d'esta resolución nel *Boletín Oficial del Principáu d'Asturies*, o directamente impugnase énte la Sala de lo Contencioso-Administrativo del Tribunal Superior de Xusticia d'Asturies, nel plazu de dos meses contaos desde se publique la resolución, ensin perxuiciu de cualquier otru recursu qu'estimen procedente interponer en defensa de los sos intereses.